

AUTORSKE NOVINE

decembar/prosinac 2017.

SADRŽAJ:

- Održana sjednica Skupštine AMUS-a
- Predstavnici AMUS-a boravili u Zagrebu u okviru Međunarodne autorske kreativne konferencije
- Objavljeni rezultati Konkursa za dodjelu sredstava iz Fonda za kulturne i socijalne namjene
- AMUS predstavio novi logo i web stranicu

Održana sjednica Skupštine AMUS-a

U prepunoj kongresnoj sali hotela „Bristol“ u Sarajevu 20.12.2017. je održana druga sjednica Skupštine „Asocijacije kompozitora-muzičkih stvaralaca“ AMUS u ovoj godini.

Skupštini je prisustvovalo ukupno 196 muzičkih autora-članova AMUS-a iz cijele Bosne i Hercegovine, što je najveći broj članova Skupštine AMUS-a na jednom mjestu do sada.

Također, velik broj gostiju i medija uvećao je sinočnju Skupštinu AMUS-a.



Na početku, predsjednik Skupštine AMUS-a, Edin Dervišhalidović, pozdravio je sve prisutne i ukazao na nekoliko važnih uspješnih rezultata AMUS-a u 2017. godini, od kojih je najznačajniji prijem AMUS-a u redovno članstvo Svjetske konfederacije autorskih društava (CISAC).

Skupština AMUS-a je na sinoćnjoj sjednici razmatrala Izvještaj Instituta za intelektualno vlasništvo Bosne i Hercegovine o provedenom nadzoru nad radom AMUS-a za 2016. godinu. Usvojen je novi Pravilnik o platama, dodacima i naknadama plate zaposlenim, koji je kao takav usklađen za Zakonom o radu u institucijama Bosne i Hercegovine, što je bio nalog Instituta AMUS-u.



Najzanimljivija tačka Skupštine AMUS-a bilo je popunjavanje dva mjesta u Upravnom odboru AMUS-a, nakon što su dva dosadašnja člana ovog organa AMUS-a, Maja Sarihodžić i Ibrahim Mangafić, podnijeli zahtjeve za njihovo razrješenje. Nakon provedenog tajnog glasanja, Skupština je članstvo Upravnog odbora AMUS-a popunila sa dva nova člana, Enverom Šadinlijom i Almirom Ajanovićem.

Na Skupštini je bilo riječi i o drugim aktuelnim pitanjima iz rada AMUS-a, o čemu je vođena kvalitetna diskusija velikog broja članova.

Predstavnici AMUS-a boravili u Zagrebu u okviru Međunarodne autorske kreativne konferencije

Delegacija AMUS-a koju su činili predsjednik Upravnog odbora Davor Sučić, član Upravnog odbora Amir Šehić i sekretar AMUS-a Samir Mujagić prisustvovala je petoj Međunarodnoj autorskoj kreativnoj konferenciji MAKK održanoj u Zagrebu od 22. – 24.11.2017. Ovogodišnji MAKK, u organizaciji HDS ZAMP-a i HDAP-ALAI, bio je posvećen kreativnosti i obrazovanju te autorima koji su „postali i ostali“ zahvaljujući svom kreativnom proizvodu, a o svom stvaralačkom radu govorili su, između ostalih, Husein Hasanefendić Hus i Zlatan Stipišić Gibonni.



Takođe, u okviru konferencije analizirana je vrlo ambiciozna reforma autorskog prava koju je Europska komisija pokrenula na nivou Europske unije. Glavni ciljevi koji se žele postići tom reformom su: bolja prekogranična on-line dostupnost sadržaja koji se štiti autorskim pravom; šire mogućnosti korištenja zaštićenog sadržaja u nauci, istraživanju, obrazovanju i zaštiti kulturne baštine, te bolje funkcioniranje tržišta sadržajem koji se štiti autorskim pravom.

Objavljeni rezultati Konkursa za dodjelu sredstava iz Fonda za kulturne i socijalne namjene

Na Konkurs za dodjelu sredstava za kulturne namjene iz Fonda za kulturne i socijalne namjene AMUS-a, objavljen dana 02.10.2017. godine, pristigle su 74 prijave projekata od čega su odobrena njih 22 u ukupnom iznosu od 56.000 KM. Detaljnu listu odobrenih projekata sa iznosima možete pronaći na web stranici AMUS-a na sljedećem linku:

<http://www.amus.ba/new/blog-post.php?ID=375>

Ovim putem se zahvaljujemo svim aplikantima i nadamo se uspješnoj realizaciji prijavljenih projekata.

ASOCIJACIJA
KOMPZITORA
MUZIČKIH
STVARALACAАСОЦИЈАЦИЈА
КОМПОЗИТОРА
МУЗИЧКИХ
СТВАРАЛАЦАASOCIJACIJA
SKLADATELJA
GLAZBENIH
STVARALACA

AMUS predstavio novi logo i web stranicu

Povodom petogodišnjice od dobijanja dozvole za obavljanje poslova kolektivnog ostvarivanja prava autora muzičkih djela, a sa ciljem razvijanja efikasnije web platforme za svoje članove, AMUS je predstavio novi vizuelni identitet, odnosno svoj novi logo i u rad pustio novu web stranicu obogaćenu brojnim novim sadržajima, prvenstveno za autore-članove AMUS-a.



Glavni novitet u ovoj prvoj fazi razvijanja nove web platforme AMUS-a jeste online prijava djela, putem koje će članovi AMUS-a biti u prilici da svoja muzička djela prijave direktno putem svog korisničkog računa na novoj web stranici AMUS-a. Prijava djela na taj način biće moguća s bilo kojeg mjesta i u bilo koje vrijeme, što će značajno olakšati proceduru kako autorima tako i Stručnoj službi AMUS-a.

S tim u vezi, pozivamo sve članove AMUS-a da putem e-maila (koji su prijavili AMUS-u) ili putem pošte podnesu zahtjev za izdavanje jedinstvenog pristupnog koda web stranici AMUS-a (JPK).

U drugoj fazi razvijanja web platforme AMUS će omogućiti članovima brojne druge pogodnosti, među kojima je i detaljan uvid u njihova prijavljena djela.